

四庫全書

史部

欽定四庫全書

平定準噶爾方略前編卷二

康熙五十四年五月申辰

命賑濟哈密

上諭議政大臣等曰喀密為策妄阿喇布坦所侵恐不能生理著甘肅巡撫遣官運送米糧牛羊往賑

丁未

命給八旗軍前効力人口糧馬匹

上諭八旗都統曰此番出兵之路甚遠請往効力軍前  
人內有不能自備盤費者查明啓奏給與糧馬監禁  
中除重罪大盜外其餘罪輕者若不能自備亦給與  
糧馬前去効力功成即可以贖罪誠伊等自新之路  
也

已酉

甘肅提督師懿德奏赴甘州會議軍務

師懿德奏言臣領兵至西吉木地方據總兵官

路振聲報稱策妄阿喇布坦兵已遠遁臣隨令  
路振聲暫駐哈密候

旨并撤回涼州官兵臣亦領兵暫回肅州據路振聲云  
哈密無牧馬之處可以駐兵應去哈密一日程  
移駐塔勒納沁地方有水草處臣思賊雖逃遁  
而哈密勢屬孤單應令路振聲等即駐塔勒納  
沁地方候

旨遵行近奉

旨著吏部尚書富寧安西安將軍督撫等率領滿洲綠  
旗官兵前往救援臣於五月初一日自肅州赴甘州  
以備會議軍務奏入報

聞

壬子

議政大臣等以訊問被擒厄魯特曼濟供詞奏

聞

議政大臣等奏言臣等遵

旨詳訊被擒厄魯特曼濟據稱我本土爾扈特人我阿  
玉奇汗之子三濟札卜當年與父有隙率一萬  
人投策妄阿喇布坦策妄阿喇布坦擒三濟札  
卜送還土爾扈特留我等萬人分給所屬宰桑  
等至策妄阿喇布坦來侵哈密之故聞準噶爾  
老人言去年喀爾喀擒我阿爾台打牲一人殺  
一人又我地貿易者為哈密所阻以是欲蹂躪  
之其人衆每部落千五百戶計三萬人其徵賦

無定額凡有所需斂諸屬下人皆凋敝自和碩  
特土爾扈特輝特都爾伯特台吉屬人外及其  
十四部落無不人人怨策妄阿喇布坦去年雪  
深三尺餘其所居伊犁等處牲畜盡斃其子往  
攻安集延地方之布魯特被殺者五百人還又多  
病死再我土爾扈特一萬餘人皆愁苦度日各  
有戀土之心常欲乘間脫歸或歸命

天朝方策妄阿喇布坦來侵哈密時衆人皆言其不自

揣量輕犯

天朝若大兵來討何以為計禍敗已徵猶不耕牧安生  
固自取滅亡耳奏入得

旨策妄阿喇布坦處著遣使分兩路齎諭旨前往將喀  
爾喀所獲之厄魯特著隨哈密路使臣去哈密所獲  
之厄魯特著隨喀爾喀路使臣去

乙卯

命使齎勅宣諭策妄阿喇布坦



時策妄阿喇布坦兵敗潛遁

上諭議政大臣詳籌三路進兵之事

特頒勅諭宣諭策妄阿喇布坦

上以勅書示議政大臣等曰朕經歷軍事甚多今觀曼濟所言策妄阿喇布坦情勢與朕所預料者相合乘彼人馬疲弱之時應兩路興兵扼要駐劄遣使往諭

至是遣原任員外郎保住由喀爾喀路藍翎克

什圖由哈密路分道齎往

諭曰去年爾衆擅掠我喀爾喀之人故喀爾喀巡哨之  
兵追逐殺爾打牲一人擒一人而歸我哈密之往吐  
魯番貿易者因爾亦不令回故從吐魯番處行文與  
爾不知曾到與否今爾無故領兵二千侵我哈密為  
我兵二百人所敗而遁今我兵已四路雲集斷難中  
止從前爾雖狂妄啟奏朕為天下主無不寬容况爾  
曾奏云令我等喀爾喀厄魯特青海之衆皆復舊業  
以安人衆爾今可令和碩特土爾扈特輝特之人俱

回原處與伊兄弟完聚其在我處之輝特朕亦令回  
原處完聚於阿拉克山居住拉藏汗之子爾可速送  
還拉藏爾只領準噶爾之衆僻在額爾齊斯居住則  
已再前給爾準噶爾之衆本我所應有之人彼等亦  
不願屬爾處爾之人心離異各為身計不但衆人皆  
知即爾亦自知之爾果欲起兵此等人朕皆當收養  
誰不欲享太平乃肯為爾冒死耶況我用兵並無掩  
襲爾常自以為強可親身前來會盟定議不然恐爾

又詭稱使臣不能盡達爾言也前爾屢奏所遣使人  
中途為人阻隔朕因遣使約爾來會爾又懇奏戶口  
無幾原不足數且僻在一隅若相近邊境有可効力  
之處情愿報効今何無端食言侵我哈密若不來會  
盟斷無了期兵興之際受傷生齒必多爾若畏懼不  
來則爾向稱欲安人衆之言皆為虛偽朕必親征或  
遣王大臣等領兵直抵爾巢穴必不容爾信口支吾  
也爾其定意即於所遣使臣回時具奏

賜擒送厄魯特之哈密佐領色珀爾等蟒袍銀緞衣服等物

戊午

傳諭俄羅斯楚庫拜姓城頭目

上諭議政大臣等曰策妄阿喇布坦無故侵我哈密今大兵進討應行文曉諭俄羅斯邊界地方楚庫拜姓城之頭目令其加意防守邊界如有策妄阿喇布坦之人投向爾處即宜收留授內閣侍讀品級圖禮琛

從前往土爾扈特時路經俄羅斯熟識彼處頭目可著  
前往

酌籌增兵運糧事宜

議政大臣等奏言前調西安滿洲綠旗兵五千  
已各遣一千駐噶斯口扼要外餘兵止有三千  
及甘肅提標兵已還甘肅由哈密進發之兵稍  
覺單弱應撥甘肅提標兵三千涼州固原寧夏  
兵各二千遣官率領前進令席柱富寧安統領

其支給兵丁糧米應運肅州等處米二萬石至  
哈密其運米騾馬令支庫帑在西安甘肅等處  
採買如不足數則在青海等處採買冬寒驅至  
甘肅等處飼養備用進兵時兵丁行糧則米及  
牛羊兼給令甘肅巡撫綽奇隨大兵料理奏入  
得

旨固原寧夏兵著董大成吳坤率領前進甘涼兵著師  
懿德率領前進餘如議

已未

移駐哈密官兵

議政大臣等奏言據哈密佐領色珀爾稱策妄  
阿喇布坦兵驟至城北數村莊田不得耕種今  
官兵駐西喇呼魯蘇台若北徙托和齊哲克得  
里等處則我衆得安耕種矣請令總兵官路振  
聲移駐托和齊哲克得里形勝之地令巴里坤  
等處要路嚴斥堠謹偵諜奏入



上從之

六月庚午

命給喀爾喀扎薩克王符驗

上諭議政大臣等曰喀爾喀扎薩克王等著會議給與憑據伊等所居地方相隔遙遠若當有事即互相救援甚好况敏珠爾公旗分尤遠居界外勢亦單弱喀爾喀等同係扎薩克倘遇有事私去救援不知是與不是大家觀望事必擔悞著將給與符驗之處議奏

議曰推河附近杭愛山陰居住之敏珠爾公等  
扎薩克鄂爾昆圖拉居住之喀爾喀圖謝圖汗  
扎薩克等如有至推河備兵者其輜重妻子必  
留本處應行文祁里德等令杭愛山陰及鄂爾  
昆圖拉居住之扎薩克兵往額克阿喇勒等處  
駐劄杭愛山陽居住之扎薩克兵往推河駐劄  
其間酌量安臺彼此傳信令兵部發予令箭每  
扎薩克各給十二枝遇有警持箭傳諭鄰近扎

薩克即率兵救援後者按軍法治罪奏入

上從之

壬申

命祁里德等移駐官兵並籌議屯田運餉

上諭議政大臣等曰今敏珠爾公所住厄德爾齊老圖  
地方去推河不遠應令祁里德等在厄德爾齊老圖  
左近擇有水草可以耕種及魚獸繁多之處移兵駐  
劄既便於打牲又可保護敏珠爾公等眷屬將米運

至駐兵處不但有益而進兵亦近運米事不可遲緩  
著即繕摺具奏議曰應行文將軍費揚古散秩大臣  
祁里德會同喀爾喀汗王等公議於敏珠爾公  
所居厄德爾齊老圖附近額克阿喇勒科卜多  
烏蘭古木等處擇要害適中之地有好水草可  
耕種者令諸軍駐劄方今右衛等處官兵所支  
糧雖足一年之用但糧運不可以不預籌請運  
湖坦河朔細米二萬四千石令直隸山西支正

帑採買馬騾一萬五千匹於七月驅至湖坦河朔運米一萬二千石至駐兵處再令山東河南亦支正帑採買馬騾一萬五千匹明年草青時驅至湖坦和碩再運米一萬二千石至駐兵處其馬騾運米訖於進兵時令馱子母礮位等物御製子母礮應運三十位給將軍席柱處五十位給將軍費揚古處備用奏入

上從之

甲戌

西安將軍席柱吏部尚書富寧安議取吐魯番  
席柱等奏曰吐魯番與哈密接壤且策妄阿喇  
布坦咽喉要地當先取之沿途設站運米之事  
應於布隆吉爾巴里坤兩處各設兵五百大兵  
所用馬匹先飼養五十日於七月二十日啟行  
八月十五日前後至巴里坤休養數日從哈密  
之北大山後烏蘭烏蘇路進兵九月初五六日

可到闕展吐魯番地方越山近臨吐魯番城池  
相機勦撫平定吐魯番後招安蘇爾統等回入  
一面傳檄哈薩克布魯特不但吐魯番易取即  
策妄阿喇布坦自來亦可勦滅既取吐魯番再  
相機進勦策妄阿喇布坦奏入

上諭議政大臣等曰覽富寧安席柱所奏今年進兵取  
吐魯番等語若在甘肅等處將馬匹喂養肥壯於九  
月間方取吐魯番則時值冬令且伊地方太近不如

仍照原議明年前進為當祁里德處信息亦應等候  
再策妄阿喇布坦曾有秋天兵至哈密之語總兵官  
路振聲之兵止有一千力量單弱西安之兵既在甘  
肅等處喂養馬匹著將甘肅提標營兵二千添發路  
振聲處

丙子

議撤回鑾儀使董大成

上命仍往噶斯口



議政大臣等奏言據尚書富寧安疏奏臣遵

旨撥滿洲綠旗兵各一千令鑾儀衛鑾儀使董大成率

往噶斯口前奉

旨令董大成吳坤領固原寧夏官兵應撤回董大成令

將軍席柱遣西安副都統噶爾璧前往奏入得

旨董大成既已派往不必撤回

戊寅

籌辦進勦官兵馬匹

甘肅提督師懿德奏言吏部尚書富寧安將軍  
席柱等奉

命前至甘州與臣等籌議除遣往噶斯路防守之滿  
洲兵督標綠旗兵各一千外其進勦時撥滿洲  
兵二千督標綠旗兵一千臣標兵二千火器營  
兵五百涼州鎮標馬兵一千寧夏鎮標馬兵一千  
肅州鎮標馬兵一千火器營兵五百其各鎮標  
撥遣之兵所需乘騎及運米馬匹俱向各鎮取

給臣標馬步兵二千五百共需馬五千二百五十匹除現存馬匹給與外尚缺二千匹請以寧夏涼州等鎮標下馬協助但臣所屬各營俱沿邊要路營馬不便空懸請於料理軍務大臣處領帑購買補足奏入

上命議政大臣等議奏議如所請

上從之並

諭曰現今需用緊急收取各營馬匹時價必致騰貴其

補給價值務使兵丁得沾實惠令其速補

議政大臣等議軍行分駐地方並運米安臺事

宜

西安將軍席柱疏言運米馬匹請在甘肅等處  
飼養五十日於七月二十間出口八月十五前  
後至巴里坤奏入

上命議政大臣等議奏議曰口外八月草將乾黃且馬  
匹飼養僅五十日亦不甚肥今塞草方茂應令

將軍席柱等不必在甘肅飼養除師懿德提標  
下兵二千往駐防哈密總兵官路振聲軍前外  
其餘兵丁俱令以次出口由布隆吉爾塔勒納  
沁至巴里坤擇好水草處分駐其運送哈密之  
米令巡撫綽奇兼用車運自嘉峪關尾大兵後  
直至巴里坤兵部理藩院各遣司官一人於甘  
肅州縣調取人馬安設臺站遣部院筆帖式往  
坐臺奏入

上從之

己卯

撥運河東米麥

甘肅巡撫綽奇奏言臣奉

旨大兵所需米石交甘肅所在購備但河西非產米之區倉廩多貯麥豆應於河東鄰省採買奏入

上命議政大臣等議奏議曰應行文巡撫綽奇先行辦給前進兵丁兩三月口糧此外應運米石令總

督鄂海運官就鄰省倉內所貯米麥運至綽奇處再令綽奇陸續運至哈密奏入

上從之

庚辰

增給運米安臺兵丁

都統圖思海奏言臣奉

旨管理糧運計自瑚坦和碩至推河應設臺七十每臺須兵三十名除所撥直隸山西兩省撫標下步

兵各二百歸化城土默特兩旗察哈爾右翼四  
旗兵六百赴臺外其不足者尚一千一百名請  
以土默特察哈爾兵及直隸山西兩省步兵增  
給奏入

上命議政大臣等議奏議如所請

上從之

乙酉

命撥鎮安將軍潘育龍標兵屬甘州總兵官袁鈐管轄



甘肅提督師懿德疏言奉

旨命臣率進勦兵丁前往但臣所屬諸營並沿邊防守

尤為緊要請令鎮安將軍潘育龍撥標下馬兵  
二千給甘州總兵官袁鈴管轄兵部議覆應如  
所請

上從之

丙戌

散秩大臣祁里德等以會議進勦策妄阿喇布

坦事覆奏

祁里德等奏言臣等集喀爾喀汗王台吉及熟  
識路徑之散秩大臣晉巴等會議據喀爾喀汗  
王台吉等言我兵從此進勒策妄阿喇布坦有  
兩路一由布拉罕順額米爾河尋伊犁河過阿  
勒坦厄默勒嶺一由博克達額林哈畢爾噶進  
闡勒奇嶺此兩路俱至額米爾河於博羅塔拉  
地方會合計策妄阿喇布坦兵可四萬人尚書

富寧安等兵應由哈密至巴里坤同將軍費揚古等先取吐魯番進至朱爾都斯之地我等喀爾喀兵止一萬必合內地兵方可深入請於博克達額林哈畢爾噶一路設兵一萬五千布拉罕一路設兵三萬進勦我等喀爾喀兵於七月二十前後啟行在布魯爾布拉罕口附近駐劄養馬其應否即行進勦或遣使招降再行請旨至哨探處各扎薩克令臺站連接直至推河等語臣

計策妄阿喇布坦縱有兵四萬各處分守兵亦無多若博克達額林哈畢爾噶一路有兵一萬布拉罕一路有兵萬五六千度可足用奏入

上諭議政大臣等曰喀爾喀汗王等所議意欲增兵助勢似屬相宜今年未便進兵之處喀爾喀等尚在未知其欲令將軍費揚古等兵合并哈密一路朕意哈密一路富寧安之兵甚屬整壯費揚古兵不必發往哈密仍與喀爾喀兵為一路於明歲進兵時再行添

發可也

丁亥

命西安巡撫噶什圖往甘肅同巡撫綽奇隨軍料理糧  
餉馬匹等事尚書富寧安亦令總理

秋七月甲午朔

增給和托輝特公博貝兵丁

上諭議政大臣等曰近和托輝特公博貝奏請招撫烏  
梁海及策妄阿喇布坦所屬厄魯特都爾伯特丹津

一千戶人若伊等抗拒不服即行攻取等語似此動作以張聲勢甚是其間設有不睦致相仇敵聞博貝之兵前往以為大將軍至紛紛擾亂便不得彼真信雖策妄阿喇布坦兵來救援地方亦遠更有阿爾台嶺之雪攔阻不能前進矣又據博貝奏臣有兵一千五百度已足用若聖意以為尚應添兵則有根敦扎薩克羅卜藏所屬翁牛特兵扎薩克濟納米達兵扎薩克台吉阿里雅兵俱善於攻戰可以破敵將此三

扎薩克兵添給足矣著照博貝所請將三扎薩克兵  
添給博貝帶領前去遣人往烏梁海處以好言招撫  
若不歸順逃入樹林深密處亦無關緊要相機行事  
可也至都爾伯特丹津處應再探其情實或撫或勦  
博貝領兵前往時若有策妄阿喇布坦兵向我喀爾  
喀直衝前來即著尾其後以牽制之都爾伯特丹津  
與厄魯特散秩大臣策凌為弟兄可令策凌遣一親  
信人寫給書信爾等將現在所議之事發與博貝或

派章京或筆帖式飛馳前往并帶車領人同去即隨  
博貝兵一齊進發

丙申

賜出征齊齊哈爾副都統白濟索倫總管布珠孔雀  
銀兩馬匹

己亥

命協濟推河一路軍臺馬匹

上諭議政大臣等曰推河一路臺站俱係歸化城之士



默特三處烏喇特毛明安四子部落之臺站伊等  
年遭雪牲畜損傷軍需事務恐致遺誤既現有運  
大臣所設臺站遇有緊要事務著將運米臺站馬  
通用

丁未

命籌議運餉

上諭議政大臣等曰軍務糧餉關係甚大天時地利不  
可不通徹籌畫現今運米一事朕甚為躊躇近日古

隸河南巡撫奏稱牲口已如數起解又稱因雨水過多恐泥濘不能即到等語看來今歲雨水實大此項牲口到瑚坦和碩定疲瘦不堪且前去路遠必值沍寒之時回時更屬歲暮嚴寒人與牲口不慣受冷必致損傷所遣大臣雖欲竭力圖効亦無可奈何著將此旨發示將軍費揚古並散秩大臣祁里德等滿洲索倫蒙古兵糧若能節用支持到明年五月則今歲預備齊畢來春青草一發運米前往於計為得也著

詳議具奏議曰冬行惟駱駝耐寒計今年運米駱駝  
三千可以足用其直隸山西騾馬應暫停其解  
送即令於本省飼養明年青草將出之前驅至  
瑚坦和碩交與都統圖思海等并山東河南騾  
馬運送餘米隨兵前進再圖思海等亦應令停  
往瑚坦河碩俟來春前去奏入得

旨如議朕有進哨時所用駱駝三百隻在達卜遜淖爾  
亦取來發往尋議政大臣等奏曰今年運米所需駱駝

三千除官駝一千外應遣大臣一人齎帑往張  
家口殺虎口鄂爾多斯歸化城等處購買以  
足三千之數送往瑚坦和碩奏入

上命吏部侍郎傅紳前往

戊午

肅州總兵官路振聲請移兵駐烏克克嶺

路振聲奏曰臣奉到部文令臣移駐哈密城後  
托和齊哲克得里等處其地即哈密第三堡西

北之沙棗泉土多濕熱牧馬不肥沙棗泉西北  
九十里有山曰烏克克嶺山下即巴里坤地界  
登山而望遠近瞭然臣即移營就要路駐劄山  
峽小徑各撥兵巡防俟額駙阿寶輝特公羅卜  
藏等兵到日於巴里坤再相度要地駐劄奏以  
上命議政大臣等議奏議如所請得

旨報可

辛酉

命公傳爾丹等監管喀爾喀蘇勒圖喀喇烏蘇等處屯

田事

先是

上以厄德爾齊老圖地近推河應屯田駐兵令將軍費揚古等與喀爾喀汗王等會議至是費揚古等奏言臣等以屯田事詢喀爾喀圖謝圖汗等據稱蘇勒圖喀喇烏蘇拜達里克河明愛察罕格爾庫爾奇勒扎卜罕河察罕度爾布拉罕口烏

金史卷一百一十五  
卷二  
蘭古木等處俱可耕種再臣等所統兵丁現駐  
察罕托輝扎卜罕河特斯河一帶地方應撥土  
默特兵善種地者一千每旗令台吉塔布囊一人  
率往屯種遣大臣一人監管奏入

上命議政大臣等集議議如費揚古等所請再哈密地  
亦可耕請一併行文將軍席柱尚書富寧安將  
西吉木布隆吉爾等處勘明具奏得

旨如議公傳爾丹情願前往効力即交伊辦理再著原

任都統宗室愛音圖護軍統領達米納侍郎能泰銑  
圖同往後都統穆賽等疏言烏蘭古木在新設汎界之  
外地並山坡山溝不便耕種其科卜多布延圖  
郭勒等處耕種收穫甚多應預備籽粒田器給  
與公傅爾丹率土默特人一千及出兵歸化  
城之土默特兵一千令往耕種議政大臣等議  
如所請

上從之



臣等謹案三代以上寓兵於農漢時始立屯田以資邊食考漢書所載昭宣之代內則金城湟陬外則渠犂車師或以兵留耕或用弛刑募徙之徒領以田官督以校尉都護屯政莫詳於此蓋屯田之設不特省輓輸兼可盡地利使虜離居就貧破之勢而我過師有枕席之安故言邊計者莫要於屯田我

聖祖仁皇帝於西事之初即

勅所司留意趙充國三奏至是

特命大臣經理屯務始則分兵耕種繼更募民田作數  
年之後嘉峪關以外化沙磧為沃壤裕軍儲  
於絕域

世宗憲皇帝御極復開柳林湖諸屯設官置卒鑿石灑  
渠灌溉之法益備我

皇上聖武布昭準夷耆定玉門亭障遠越伊犁版章  
既古所未開儲胥亦古所未有謹考

兩朝屯田奏報墾開不下數萬頃歲收率以鉅萬計茲  
當西陲底定諸部歸誠屯政備修農功益普  
絕塞無不可耕之土荒陬無不習耕之人龍  
堆極望鋤耨如雲於以纘承

謨烈恢宏憲章猗歟盛哉

將軍費揚古奏報進兵日期

費揚古疏言臣等於五月初二日率兵啟行中  
途因少水草分隊而行七月初十日臣等先率

前鋒至推河綽諾和碩地方後隊陸續即至奏  
入報

聞

八月乙丑

停運鄰省米麥

四川陝西總督鄂海奏言甘肅所貯米麥及現  
在採買米石足給兵丁又莊浪西寧鞏昌三處  
舊貯粟米四萬餘石可運三萬石至甘州與甘

肅存倉之麥陸續運至軍前支給有餘若從鄰省運送路遠費多應請停止奏入

上命議政大臣等議奏議如所請又議曰前令西安甘肅巡撫俱隨軍料理糧餉今年既不進兵應令一人往軍前一人駐劄肅州籌辦糧運俟明年進兵一同隨軍料理奏入

上從之

庚午

命尚書殷特布齋帑購買駝隻

議政大臣等議曰今年用駱駝所運米四千八百石及明年用騾馬所運米一萬二千石俱以預備前往推河之右衛黑龍江兵及籐牌手等口糧但明年進兵時兵數益增所運米石應益多計運米惟駱駝行走便利既不多需人夫而所載倍於騾馬蒿齊特蘇尼特等旗去年牛羊馬匹雖被雪傷而駱駝不損應遣大臣一人齋

帑赴各旗購駱駝四千驅至大同宣化交地方  
官動支帑項飼養肥壯俟明年青草未出之前  
送至瑚坦和碩亦交與都統圖思海等以備運  
米之用奏入得

旨著兵部尚書殷特布去餘如議

乙亥

訓飭甘肅巡撫綽奇

綽奇奏請運糧哈密需用嚮導

上諭大學士等曰據綽奇題請嚮導看來辦事平常隨  
尚書富寧安前往之人熟識路徑者甚多且有一佐  
領回子駐劄肅州何用再以嚮導奏請况富寧安係  
特旨派往辦理軍務糧餉大臣凡事應與合心辦理  
豈可各自具奏若一事而內閣兵部理藩院各自行  
文巡撫提鎮並不會同富寧安各行具奏則往來需  
四五十日必致誤事驛站亦多騷擾此後除軍機要  
事外其巡撫提督總兵官所奏之事著會同富寧安



具奏至此等平常事件著將兩三件會為一處遇便  
進呈事務不可煩多如將軍費揚古散秩大臣祁里  
德同心辦理事無煩擾殊可嘉也

已卯

右衛將軍費揚古以病求解任

上諭曰費揚古著帶右衛將軍印徐回右衛今年既不  
進兵將右衛等處兵交與散秩大臣祁里德喀喇沁  
塔布囊額駙格勒爾齊齊哈爾副都統白濟右衛副

都統齊格公同管理著都統穆賽馳驛前往總理軍務俟進兵時另派大將軍給與印信

甲申

命散秩大臣郭廉等協辦駝隻

上諭議政大臣等曰購買蒙古各旗駱駝兵部尚書殷特布一人不能料理著散秩大臣郭廉護軍叅領巴祿前往協同購買送至宣化大同喂養即著殷特布監管俟明春發往軍前

辛卯

訓諭都統穆賽

上諭曰朕以爾為人可用特令前往統領大兵其右衛黑龍江喀喇沁察哈爾土默特鄂爾多斯喀爾喀等處兵丁務令共相和好至管攝兵丁不可失之柔弱其効力贖罪諸人可分在各滿洲蒙古綠旗兵內勿任其聚於一處祁里德諳練蒙古事務且誠實有膽氣婁徵額雖老病曾隨朕行兵熟識地利諸事應與

伊等酌議奏聞朕所派往之新滿洲等行走熟練可  
令同我兵往汛界哨探再彼處有黃羊沙米等物應  
令兵丁採取食用如省一月口糧即得一月之益總  
兵官藍理頗驍勇熟諳軍機著隨爾辦事其原有官  
爵効力軍前者可揀選署理章京護軍校驍騎校等  
官特諭

壬辰

命鑾儀衛鑾儀使董大成回肅州

董大成奏言臣於六月二十二日領兵從肅州  
出嘉峪關自嘉峪關至噶斯口三千餘里行至  
常馬爾河因山水暴發所有運米牲口及兵丁  
所乘馬匹多致傷損倒斃今於八月十二日抵  
噶斯口奏入得

旨自邊上至噶斯口一千七百里曾經阿南達奏過今  
董大成何以又稱有三千餘里噶斯口路徑甚窄策  
妄阿喇布坦斷不由彼行走今正寒冷之時著董大

成將噶斯口迤內放火燒荒領兵回赴肅州

平定準噶爾方略前編卷二

欽定四庫全書

平定準噶爾方略前編卷三

康熙五十四年九月戊戌

賞賚右衛官兵

上諭兵部曰遣司官一員齎羊袍狐帽各一千六百件  
馳驛送往右衛將軍費揚古軍前給右衛兵丁之少  
冬衣者恐有不足並攜銀二千兩於喀爾喀扎薩克  
處購買酌量賞給



庚子

以厄魯特貝勒額駙阿寶為席柱等叅贊

議政大臣等奏言厄魯特貝勒額駙阿寶前奉  
旨為將軍費揚古散秩大臣祁里德叅贊今阿寶等兵  
既令歸將軍席柱等軍伍應令阿寶為席柱等  
叅贊奏入

上從之

己酉

烏梁海歸順

和托輝特公博貝疏報所招撫烏梁海悉歸順  
大學士等奏曰四年前烏梁海頭目和羅爾邁  
為我哨兵擒獲

皇上宥之不殺且重賞遣還以此感恩早欲來歸特以  
攜持妻子不便恐為厄魯特所追遲遲至今耳  
頃聞策妄阿喇布坦兵犯哈密即先遣其子胡  
洛虎納等來輸誠適博貝軍至烏梁海舉部歸

順此皆由

皇上之恩淪肌浹髓故不發一矢而遠人向化如此

上曰前吳三桂遣猱猱數萬到平涼助王輔臣與我軍對敵後來歸順諸大臣皆欲殺之朕謂何以殺為歸順即良民矣悉加恩宥發回原籍後進四川至保寧賊又欲率伊等與我軍對敵猱猱頭目陸道清云我等雖無知識前蒙聖主不殺之恩豈忍對敵即登山去平賊之後伊等方下山引導我軍極其効力再攻

取尼布楚雅克薩城之時俄羅斯數千人諸大臣亦  
欲盡殺之朕從寬遣回西洋國聞之皆云攻其城而  
遣回其人亘古未有今烏梁海歸順固自然之理也

辛酉

賞賚厄魯特降人特穆爾伯克默特等歸旗編伍

議政大臣等議覆西安將軍席柱吏部尚書富  
寧安疏報策妄阿喇布坦屬下特穆爾伯克默  
特等首先輸誠應賞賚袍帽等物編置八旗蒙

古佐領下為兵給與糧餉產業妻室奏入

報可

命將軍席柱尚書富寧安駐軍巴里坤

西安將軍席柱吏部尚書富寧安疏言臣等於  
六月二十九日自甘州率兵啟行八月十八日  
至巴里坤閱視形勢除總兵官路振聲已於烏  
爾圖等處設立哨探外凡烏圖布拉克庫爾默  
圖度集等處悉增設哨探再巴里坤東西並大

谷地勢寬衍水草亦佳已令現到之兵自巴里  
坤連比立營設置斥堠俟兵悉到時於巴里坤  
東一百里奎素地方遍置營壘議政大臣等議  
曰席柱等所奏毋庸另議外查前哈密伯克額  
敏曾報言策妄阿喇布坦欲於秋時復來哈密  
現今厄魯特降人特穆爾等亦言策妄阿喇布  
坦傳令治辦器械預備行糧禁所部不得私騎  
騾馬有問者但云向哈薩克出兵今大兵已於

巴里坤一路阿爾台一路整備正欲策妄阿喇布坦來耳但哨探之地尤屬緊要應令將軍席柱等嚴加防範不時巡查奏入

上從之

十二月丙寅

命撤噶斯口官兵分駐肅甘二州

吏部尚書富寧安疏言今撤噶斯一路兵回肅州養馬肅州地狹不足容兵二千且須從他處

運草豆甚煩費甘州所在寬敞民房櫛比倉中有舊貯麥豆且於附近買送草束亦便今令西安滿洲兵一千駐劄肅州綠旗兵一千駐劄甘州各令嚴謹約束勿致擾民議政大臣等議覆應如所請奏入

上從之尋復

諭尚書富寧安將軍席柱等曰朕意撤回噶斯口駐劄之兵倘策妄阿喇布坦聞知發兵從噶斯路來襲我



兵之後亦未可定仍令新滿洲侍衛及厄魯特侍衛  
等前往偵探富寧安覆奏言貝子阿喇卜珠爾及諾  
顏綽爾濟等所居色爾騰等處達顏台吉屬下  
之台吉等所居柴達木等處並通噶斯口之察  
罕齊老圖地方請令新滿洲二等侍衛俄木巴  
里厄魯特一等侍衛達克巴臧布等駐劄色爾  
騰柴達木所在形勝處偵探奏入報

聞

壬午

命護軍統領晏布率兵駐西寧

侍衛阿齊圖疏言據青海貝勒塞卜騰扎爾來  
言貝勒察罕丹津等以去年瑚畢勒罕事貝勒  
阿喇卜坦鄂木布益蘇克汪扎爾塞卜騰扎爾  
台吉達顏蘇爾扎等遵

旨不與同心今察罕丹津等將與羅卜藏丹津等盟誓  
先攻取五家然後送瑚畢勒罕往西地議政大

臣等議覆曰去年里塘新出瑚畢勒罕以來

皇上睿鑒洞徹若留此瑚畢勒罕在彼則青海諸台吉

兄弟必起爭端

特降勅旨遣侍衛阿齊圖等往移之今察罕丹津欲送  
瑚畢勒罕往西地恐塞卜騰扎爾等尾擊其後  
遂謀先攻諸部事未可定應發西安滿洲兵一  
千命大臣一人率往西寧并令總兵官王以謙  
預撥標兵三千以待若察罕丹津果肆猖狂即

發兵征勦或塞卜騰扎爾等被攻來奔即收入  
邊內安插再察罕丹津所居去松潘止四五日  
程應令四川提督康泰松潘總兵官程正李預  
備兵馬如有送瑚畢勒罕西往消息即從後追  
勦奏入得

旨如議著護軍統領晏布前往

甲申

命喀爾喀左翼車臣汗衆扎薩克協濟駝隻

散秩大臣祁里德疏言明年所運軍糧若用直隸山西山東河南購買馬騾輓運道遠勞苦請令喀爾喀左翼車臣汗衆扎薩克協濟駝隻輓運為便議政大臣等議覆曰應如所請令車臣汗等旗分協濟駝六千隻於青草未出時度量自瑚坦和碩至扎卜堪中途有水草處屯劄預備現今尚書殷特布所買駝四千益令增買二千凡駝六千隻兩次可運米二萬石令自瑚坦

和碩運至中途有水草處再以喀爾喀之駝六千隻作兩次運米赴軍其四省所購馬騾應就近撥八千匹於明年草生時送往甘肅交尚書富寧安為兵丁騎載之用奏入

報可

五十五年春正月辛酉

初用車運

議政大臣等奏言尚書富寧安疏請用山西陝

西小車三千輛每輛用夫三人自嘉峪關至哈密安設十二臺每臺各分車二百五十輛令其陸續轉運應如所奏可令甘肅巡撫綽奇前往設臺奏入得

旨依議速行尋富寧安又奏巡撫綽奇安設臺站直抵哈密應用駱駝馱載所運米至巴里坤哈密至巴里坤雖近中有科舍圖嶺間之請自巴里坤至科舍圖嶺北口設三臺令駐巴里坤步兵牽

駝運送自哈密至科舍圖嶺南口設三臺令駐  
哈密兵牽駝運送即令現今運米官員及發往  
効力官員等協同管理議政大臣等議覆如所  
請奏入

上從之

二月壬戌

簡撤在營官兵

先是將軍席柱以兵丁米糧不能接濟具奏尋



尚書富寧安奏言現在所運到米麥六千五百  
餘石已於冬季給散各兵有餘議政大臣等奏  
曰席柱既以米糧不足行文富寧安速運濟軍  
乃不俟富寧安回文遽爾具奏殊屬不合俟軍  
務完日應將席柱查議至是

上諭議政大臣等曰運送糧餉安設臺站牧養馬匹等  
項俱係領兵將軍職任今米糧不能運至皆由水草  
不足之故朕昔親統大兵中路出征時沿途必留有

水草之處以牧運米牲畜爾等所親知者身為領兵將軍此等事不能深曉領兵直前致沿途水草如火燒赤地後隊兵馬及運米人役牲畜有不致困乏者乎朕曾屢諭衆大臣云領兵將軍甚難凡事不可不周到今歲停止進兵候種地及一應事務預備完畢審察兩下軍情再行定奪者為此故也且去年駐防哈密二百名兵戰敗策妄阿喇布坦時衆大臣俱欲進兵如果彼時即行進兵路途遙遠米糧焉能接濟

現在駐劄食用米糧尚不能接續若彼時即行進剿  
不知作何景況矣如喀爾喀一路都統穆賽等所統  
之兵俱係滿洲蒙古熟練之人並無糧餉不足等事  
將軍席柱等所統之兵尚未熟練所以如此倘運糧  
不至所闕甚大行令將軍席柱提督師懿德等酌留  
足用汎守調遣之兵其庸懦不堪者著會議撤回後

席柱等遵

旨議撤西安滿洲兵二百督標馬兵五百固原將軍標

及甘肅提標肅州涼州寧夏各鎮標馬步兵四千三百令所管官率之各回本營其巴里坤駐劄兵除種地五百人外共留滿洲綠旗兵七千五百奏入得

旨噶斯口撤回之滿洲兵丁一千名綠旗兵一千名現在肅州養馬俱已肥壯於青草盛時發往巴里坤再派綠旗兵三千名預備之處著行文富寧安令其速為料理

乙丑

命副都統蘇爾德管理圖古里克都爾博勒金喀喇烏  
蘇等處屯田事

諭議政大臣等曰巴里坤科卜多烏蘭古木等處種地  
之事甚屬緊要若種地得收則諸事俱易著會議具  
奏尋議曰開墾田地現今公傅爾丹等率土默特人  
一千往烏蘭古木等處耕種所需牛種田器應  
令都統穆賽等支帑購買發往軍前贖罪人等

有願耕種者許其耕種俟收成後以米數奏

聞議叙又前者尚書富寧安奏言哈密所屬布魯爾圖  
古里克接壤之處並巴里坤都爾博勒金喀喇  
烏蘇及西吉木達里圖布隆吉爾附近之上浦  
下浦等處俱可耕種應各令人耕種給與口糧  
牛種再兵丁有願耕種者亦令耕種俟收成後  
以米數奏

聞議叙尚書富寧安現駐劄肅州凡肅州附近之西吉

木達里圖布隆吉爾等處可令富寧安酌量耕種圖古里克都爾博勒金喀喇烏蘇等處耕種之事令大臣一人管理奏入得

旨依議著副都統蘇爾德前往管理是冬蘇爾德奏言都爾博勒金圖古里克喀喇烏蘇所種地並收穫議政大臣等議令蘇爾德預備牲畜器械籽種為明年計奏入

報可

三月辛丑

命使再諭策妄阿喇布坦罷將軍席柱以晏布代之路  
振聲為叅贊

上諭議政大臣等曰差往策妄阿喇布坦處之克什圖  
保住並哲卜尊丹巴胡土克圖之使楚揚託音及策  
妄阿喇布坦差至哲卜尊丹巴胡土克圖處之使人  
潘提忠內等來京朕詢問策妄阿喇布坦情形皆已  
悉知策妄阿喇布坦乃巨猾奸詭之人甚屬無耻以



朕之使臣非係使臣旨意非係諭旨是部文等語今爾諸大臣等向克什圖保住等詳詢策妄阿喇布坦情形將克什圖保住及楚揚託音潘提忠內等一同遣往其作何遣往之處爾等會同副都統以上並九卿大臣各陳所見詳議再傳諭漢大臣等從前但以兵糧牲畜路遠難到為念今祁里德處糧米現剩有二千餘石而西路之米亦皆陸續運到兩處之米委屬充裕無庸計慮朕從前中路出兵時曾於沿途按

站留米令煮粥以養贍營中困乏之步行跟役并貿  
易人等大有裨益今兩路進兵之站亦應照此行將  
軍席柱胸中毫無主見一應軍務糧餉俱將軍之責  
伊云我但統領兵丁運米之事與我無涉糧到我即  
行等語可見席柱無將軍之才此處亦著確議再總  
兵官路振聲一聞侵犯哈密即領兵往救且聞伊愛  
養標下兵丁甚屬出力路振聲著授為叅贊據策妄  
阿喇布坦奏懇遣使一賢能大員等語克什圖保住

出使策妄阿喇布坦處所已經數次今加伊等大衛  
前去即係大員矣再凡為使臣者果能一體同心於  
事方克有濟若內有不睦互相掣肘彼此言語矛盾  
一有差失則無益於事伊等有不合處即當明言為  
是再派出在京一人偕克什圖保住前去此處亦著  
會議書諭旨時令克什圖保住等面看繕寫伊等俱  
以為宜其再明示諸大臣我兩路兵馬牲畜糧米一  
應俱已齊備兩處軍中業已種地收穫可期此番使

臣到策妄阿喇布坦處得其確實情形即將大兵逐漸進至伊地告以會講遣往並非進勦之兵亦無不可也尋議政大臣等遵

旨議曰策妄阿喇布坦實巨猾奸詭之人今仍遣使前往頒示

諭旨彼若怙惡不悛現今阿爾台巴里坤兩路大兵已集應於明年草發時進勦克什圖保住及同往之原任郎中奔璽應加品級候

旨酌定再策妄阿喇布坦行文與哲卜尊丹巴胡土克圖應令哲卜尊丹巴胡土克圖給與回文仍令楚揚託音攜往現今兩路軍前糧米充裕應行文都統圖思海尚書富寧安等從容輸運前路出兵時因奉

上諭沿途按站留米於步行跟役及貿易人等大有裨益今亦應令每站留米交與驛站官員令其煮粥養贍席柱無將軍之才應遣大臣一人往代

總兵官路振聲愛養標下官兵効力行間應授  
為叅贊奏入得

旨依議著護軍統領晏布前往代將軍席柱是月侍衛  
滿泰疏劾席柱缺少甲仗倒斃馬匹副都統吳  
坤年老疲憊議政大臣等議曰席柱應革去將  
軍調取來京嚴行察議吳坤亦應撤回更遣總  
兵官管理奏入得

旨著總兵官張宏印馳驛前往代副都統吳坤餘如議

癸丑

命土爾扈特貝子阿喇卜珠爾率兵防守噶斯口

阿喇卜珠爾奏請軍前効力

上諭議政大臣等曰阿喇卜珠爾所居之處與噶斯口甚近伊既奏請往軍前効力著帶領伊屬下兵丁五百名於青草發時前往噶斯口防守設有策妄阿喇布坦往來之人令其擒送并行令青海台吉達顏貝勒益蘇克汪扎爾亦派兵百名協同防守

戊午

命貴州巡撫劉蔭樞赴軍前

劉蔭樞題請緩圖北征

上命九卿等集議至是議覆曰劉蔭樞本不知兵且遠在天末未悉邊界情形妄行陳請應交與該部議處奏入得

旨策妄阿喇布坦無知蠢動侵擾我哈密應發大兵即行殄滅但朕好生為念不忍驟加勦除因備兵邊地



遣使宣諭俟其悔罪自新為中外生靈計其萬全措  
置之際必籌其前後慮及久遠防微杜漸始合機宜  
自策妄阿喇布坦侵擾哈密以來朕從容與大小臣  
工公同商酌辦理軍務並未嘗有逞一己之怒形諸  
聲色及統兵親勦之處劉蔭樞聽信訛傳邸抄妄行  
具奏以為分清邊界便可畢事如策妄阿喇布坦乘  
間竊發邊民能保不受害乎劉蔭樞尚未衰邁著乘  
驛前赴軍前盡心周閱矢公詳議具奏

閏三月壬戌

罷鑾儀使董大成

先是大成疏言臣至噶斯口巡視絕無來往人迹噶斯地勢三面雪山中有一線水草並蘆葦其大路在得卜特爾西南走藏東南走青海西寧大通河半月即到永固城西北走柴達木吐魯番等處乃策妄阿喇布坦出入咽喉要路又據營總吳通保等各報兵糧兩月已完運米官

又不能悉運至彼是以臣於九月十一日移駐  
得卜特爾奏入得

旨董大成已有旨著回肅州到後著勒限馳驛來京其  
官兵交尚書富寧安統轄至是兵部題稱前阿南達  
奏言自邊界至噶斯口一千七百里今鑾儀使  
董大成奏言自嘉峪關至噶斯口三千餘里董  
大成誤信協領吳通保導引不由阿南達所由  
之路繞道紆行以致兵丁勞苦馬匹損傷請罷

董大成鑾儀使奏入

上從之

癸亥

命湖廣總督額倫特署理西安將軍事務并協同川陝  
總督辦理軍餉

己卯

命使諭青海二翼台吉

侍衛阿齊圖疏言青海台吉等初言送瑚畢勒

罕往紅山寺繼又請送往宗喀巴寺始終推諉  
不令起程自奉

旨令護軍統領晏布統兵駐劄西寧四川提督康泰松  
潘總兵官程正李等整兵預備復屢諭青海台  
吉等若等始懼於三月十五日送瑚畢勒罕至  
宗喀巴寺但青海二翼台吉今雖和睦恐不能  
久請令羅卜藏丹津察罕丹津達顏管理右翼  
事務額爾德尼額爾克托克托鼐阿喇卜坦鄂

木布管理左翼事務再遣大臣同郎中長受主  
事已特瑪至青海會盟令其永遠和睦議政大  
臣議覆如所請得

旨依議著公策旺諾爾布侍衛布達理前往翼日又

諭議政大臣等曰前令西寧駐劄之晏布往噶斯口防  
守今派晏布令代將軍席柱可將西寧駐劄之西安  
滿洲兵選五百名令侍衛阿齊圖護軍叅領欽第由  
統往噶斯口形勝之地防守現在瑚畢勒罕之事俱

已就緒其四川松潘等處預備兵丁著撤回

庚辰

尚書富寧安奏撥巴里坤綠旗預備官兵

富寧安疏言巴里坤官兵庸懦不堪者已撤回  
五千人遵

旨噶斯口撤回之滿洲綠旗兵二千已於四月內發往  
巴里坤外其預備綠旗兵三千請撥西寧鎮標  
馬兵一千火器營步兵五百涼州鎮標馬兵七

百火器營步兵三百甘肅提標馬兵三百火器  
營步兵二百令副將等官預備調遣其應給馬  
請以甘肅等處營馬給之議政大臣等議覆如  
所請得

旨西寧地方關係甚要現將西寧之兵派出五百名同  
阿齊圖前往則西寧兵丁不必再派著仍於固原寧  
夏兵丁內選擇派出餘如議

夏四月戊戌



命兩路軍前各嚴防範

上諭議政大臣等曰兩路兵駐劄已久軍中哨探之事甚屬緊要倘有疎忽致策妄阿喇布坦之人在邊境私自往來則大有關係其嚴加防範之處著速議具奏尋議曰各防守處選幹練官校不時巡查若策妄阿喇布坦之人有歸順前來者作速解送來京其私往來者即行拘執奏入

上從之

五月丁卯

賞賚巴里坤留駐官兵

四川陝西總督鄂海疏言巴里坤留駐官兵營  
帳衣帽等物多已敝壞請於西安布政司所貯  
軍需庫銀借三月兵餉製辦每月於給賞時扣  
償兵部議覆應如所請得

旨著動正項錢糧製造速行運給不必扣除抵還

六月壬子

設倉於布隆吉爾

尚書富寧安疏言布隆吉爾等處所種田禾俱可豐收應造倉廩及收貯農器房屋請遣官預為修理議政大臣等議如所請奏入

上從之

秋七月辛未

命侍衛阿齊圖駐兵察罕烏蘇

阿齊圖疏言臣於六月初六日到察罕烏蘇地

方據台吉達賴等言察罕烏蘇地勢寬闊水草亦佳宜於駐兵策妄阿喇布坦使人到青海路必由此若往西藏必由察罕托輝此兩路設兵防守則噶斯口以內不能飛越矣再自噶斯口過達卜遜戈壁有地名噶順可進塞爾騰地方此處亦當設兵臣遣人往視噶斯口果無可以駐兵之處今將分兵為四營駐劄察罕烏蘇令護軍叅領欽第由等領兵駐劄噶順奏入報

聞

丁亥

募民屯田於嘉峪關外

尚書富寧安疏言臣遵

旨於達里圖等處耕種田苗茂盛豐收可期但軍需莫  
要於糧米臣復細訪自嘉峪關至達里圖可耕  
之地尚多肅州之北口外金塔寺地方亦可耕  
種請於八月間臣親往遍行踏勘會同巡撫綽

奇募民耕種外再令甘肅陝西文武大臣及地方官捐輸耕種無論官民有願以已力耕種者亦令前往耕種俟收穫之後人民漸集請設立衛所於邊疆大有裨益得

旨著議政大臣九卿詹事科道會議具奏尋議曰令富寧安會同督撫等同往踏勘詳議具奏奏入

上諭議政大臣等曰踏勘墾種地方及設立衛所之事令富寧安會同督撫踏勘之議不合富寧安係駐劄

肅州管理軍務之人不宜派往著巡撫綽奇將可以  
墾種地方前往勘明會同富寧安確議具奏尋富寧  
安疏報巡撫綽奇勘閱肅州迤北可以開墾之  
處甚多度量河水所溉田金塔寺可種三百石  
自嘉峪關至西吉木可種一百三十石達里圖  
可種一千一百餘石方城子等處可種五百餘  
石臣查今歲西吉木達里圖布隆吉爾三處耕  
種共收糧一萬四千餘石明年諸處請動正帑

遣官募民耕種議政大臣等議如所請從之

八月壬辰

撥解軍前馬匹

先是

上諭議政大臣等曰富寧安處需用馬匹可將八旗添設之馬及直隸山東山西河南喂養之馬酌量撥給著議奏至是議曰四省之馬前後已撥一萬四千八百匹送尚書富寧安處至八旗添設之馬應停



其撥送奏入

上從之

九月辛巳

命撥盛京吉林等處兵赴軍

上諭議政大臣等曰盛京吉林二處著揀選兵丁一千名於伊等弟兄親戚內擇可用之人每一名派與跟役二名於三月十八日前來京給與馬匹器械前赴祁里德軍前再延綏總兵官李耀曾奏請軍前効力

著伊帶領所屬兵丁五百名於青草發時亦前赴祁里德軍前

冬十月癸巳

蠲免山陝沿邊衛所額徵銀米

上諭戶部曰朕統一寰宇無分中外皆欲久安長治共樂昇平宵旰孜孜五十餘年未嘗頃刻去懷也策妄阿喇布坦前曾頻行請安遣使來往近忽狂悖侵擾哈密哈密已經編置佐領即與內地無異若不遣發

師旅置之不問斷乎不可故特徵兵備邊一切飛芻輓粟悉支正項毫無累及閭閻然而行軍置驛及諸凡輓運皆由邊境今歲山陝二省雖年歲豐收喜登大有但邊民効力轉輸在所宜恤茲特大沛恩膏將山西屬前衛右衛大同懷仁馬邑朔州保德等州縣衛陝西屬府谷神木安塞綏德米脂安定吳堡保安榆林保寧常樂雙山魚河歸德嚮水波羅懷遠威武清平山丹高臺古浪莊浪西寧肅鎮寧夏左屯中屯

平羅中衛靈寧平涼固原鎮戎西安慶陽阜城甜水  
河州蘭州洮州等州縣衛所堡康熙五十六年額徵  
銀八萬六千一百兩零糧米豆穀三十一萬七千七  
百二十五石零草二百七十六萬五千九百束零通  
行蠲免并將從前積年逋欠亦悉與蠲除諭旨到日  
該督撫卽徧行張示使遐陬僻壤莫不周知仍嚴飭  
所司實心奉行以副朕加厚邊民至意其或陽奉陰  
違澤不下究該督撫題叅從重治罪爾部卽遵諭行

蠲免山陝綠旗官兵借帑

上諭兵部曰國家綏靖邊圉剪除賊寇必須士馬飽騰方克立奏膚功恤兵之道宜亟講也朕御極五十餘年無時不以愛養士卒為念內而八旗禁旅外而各省綠旗兵丁視同一體或代還私債或遣官犒賞或嚴禁剋減所以體恤之者惟恐不至近策妄阿喇布坦狂逞跳梁侵我哈密故特徵兵預備既以轉輸糗糧又復頒給馬駝籌畫倍周加惠尤渥而山陝綠旗

兵丁首奉調遣遠途跋涉資用維艱因而預借公帑  
朕念從軍兵丁披堅執銳戮力戎行又責以還帑深  
可憫惻其綠旗兵丁所借帑金四萬八千八百餘兩  
咸與蠲除並嚴飭統轄將領實心奉行倘有仍行私  
扣者該督撫據實指叅從重治罪以仰副朕軫恤邊  
兵至意爾部即遵諭行

甲辰

宥劉蔭樞罪仍回貴州巡撫任

先是蔭樞至軍前疏言臣遵

旨親赴巴里坤軍前閱視滿漢官兵共立二十三營週  
圍二百餘里軍勢雄壯首尾相應但巴里坤地  
方居雪山之後聞入冬大雪動深數尺倘道路  
壅阻糧何以運草皆覆壓馬駝何以牧放臣不  
勝憂懼謹密奏

聞奏入

上諭大學士等曰軍機事務關係重大一言可以鼓勵

士氣一言可以退縮人心本朝自

太祖高皇帝

太宗文皇帝

世祖章皇帝迄今百有餘年所向成功事事上應

天心以正討逆巡撫劉蔭樞乃讀書之人年已八十非  
屬無知初以朕為不能忍怒及至軍前無可奏對又  
稱嗣後雪至三四尺糧何以運駝馬何食於此愈知  
其無能矣外藩蒙古共有百餘扎薩克人無一分糧



餉馬無一束草乾自古及今極寒之地何以各安生  
業觀其一經雪後驚惶失措忘其身為巡撫管轄文  
武之責如敵稍強必至效曹申吉羅森方光琛輩所  
為也朕三統大兵曾當嚴寒盛暑久行沙漠不毛乏  
水之地於軍機事務以至調養駝馬無不熟悉然後  
知古人論兵不得其道多無成功每至敗事深為太  
息朕中路統兵至商都博洛和屯於三月十六等日  
遇雨雪風霰自京師運米出口馬匹肥者倒斃反多

兵丁馬匹不甚傷損蒙古馬匹如常於此愈知古人  
乘春以圖蒙古之失策也朕近訓兵校獵至烏里雅  
蘇台八月十六日嶺巔雪深尺許至行營中惟深七  
寸駐蹕二日雪已全消此去京師七百里即如此矣  
設劉蔭樞見黑龍江東海北海等處冰結八尺之處  
必至奏請毀城郭棄地方盡行移徙矣古人云雪盈  
尺表瑞過尺成災劉蔭樞今奏稱巴里坤地方雪深  
三四尺或係伊親見或係何人告伊之處並未聲明

仍著劉蔭樞前去雪深三四尺果屬親見著據實奏聞倘聽信他人妄誕恐嚇之語亦著據實奏聞蔭樞疏覆言臣妄奏軍前雪深奉

旨令臣親往閱視但臣年老患病不能親往謹在甘州候

旨奏入得

旨劉蔭樞前奉旨親赴軍前並未周閱營壘即稱患病不候諭旨回至甘州且云入冬後雪深數尺恐懼奏

陳今令伊親閱彼處積雪情形具實陳奏又不遵旨  
往閱仍托病求回原籍若伊意欲乞休久當奏請乃  
未奉旨之前顧戀官職不請休致及至軍前稍經寒  
雪即舉動失措違旨退縮奏請回籍理應從重治罪  
但伊年老居官以來操守尚清覽伊奏摺情辭甚屬  
可憫諭旨到時著即回貴州辦事從寬免其議處

丁未

命護理西安將軍總督額倫特及尚書富寧安等各率

兵分備要地

侍衛阿齊圖疏報策妄阿喇布坦賊徒潛來馬  
廠偷盜馬匹官兵擊敗賊徒遁去臣隨遣官兵  
會同駐劄噶順汎界之護軍叅領欽第由追緝  
踪跡始知賊由山後過沙拉於欲來盜馬之時  
先執青海台吉羅卜藏丹濟卜而去奏入

上諭議政大臣等曰策妄阿喇布坦賊性狡詐知我兵  
在巴里坤阿爾台等處防守嚴密若探聽噶斯口兵

勢單弱由噶斯口來犯侵擾青海亦未可定不可不預為防備朕意派西安滿洲兵及督標兵二千名著護理西安將軍印務總督額倫特帶往西寧預備如策妄阿喇布坦由噶斯口來犯著西寧預備之兵與青海左翼台吉等會合提督康泰帶領四川之兵與右翼台吉等會合兩路協守策妄阿喇布坦斷不敢來犯倘自嘉峪關外及布隆吉爾等處以彼微弱之卒驚我大兵之後亦未可定著行文富寧安令選兵一千名預為防備朕意以為策妄阿喇布

坦知祁里德之兵今值冬季雨雪之時決不前進或由公博貝之後以微弱之卒潛來驚擾亦未可定著行文曉諭爾等速議具奏尋議曰欽遵

上諭各行預備外應行令西寧總兵官王以謙撥派西寧綠旗兵二千名預備王以謙非諳練軍務之人應令固原提督潘育龍將伊標下副將叅將等官員內有熟練軍旅者派出數員遣往西寧聽尚書富寧安侍衛阿齊圖調遣至主事巴特

瑪熟練青海之事令與提督康泰一同協理事  
務再西寧駐劄之郎中長受亦熟練青海之事  
令與總督額倫特會同商議不時偵探倘有調  
遣之處將貝勒盆蘇克汪扎爾等兵酌量調遣  
護軍叅領欽第由已經進追賊徒若請接續之  
兵令阿齊圖等即調遣西寧預備之兵前進奏  
入

上從之尋富寧安疏言遵



旨撥甘州提標及涼州肅州鎮標馬步兵共一千名令  
叅將等官率往布隆吉爾防守並令沿途居佳  
之貝勒貝子台吉等遣人不時偵探奏入報

聞

庚戌

命侍衛尤吉爾達等馳驛赴軍前

上諭議政大臣等曰一等侍衛尤吉爾達狄納二等侍  
衛佛替藍翎發喀拉哈爾哈代著往富寧安處聽用

二等侍衛諾里爾達色爾圖都墨策德爾格爾格色  
立三等侍衛額爾必赫西喇扣尼布齊爾罕藍翎南  
代查倫插著往阿齊圖處聽用俱令馳驛前往

乙卯

命散秩大臣阿喇衲赴軍前在叅贊行走

上諭議政大臣等曰散秩大臣阿喇衲著前往西路於  
八旗察哈爾兵丁內揀選人材壯健並從前隨過阿  
南達出兵舊人共四百名帶往巴里坤軍前著阿喇

衲在叅贊行走此次派出察哈爾官兵亦照從前蒙古官兵之例給賞

十二月丁亥

揀選八旗漢軍道府以下官往軍前

吏部議覆尚書富寧安疏言兵餉錢糧事務甚繁現在官員不足辦理請揀賢能官員前來肅州以便調用應將陝西鄰近之河南山西湖北等處各揀選五員發往奏入得

旨將八旗漢軍丁憂候補道員以下知縣以上官員九卿揀選三十員發往富寧安處遇缺題請補授

丙午

命侍衛郎泰等傳諭尚書富寧安

先是

上諭議政大臣等曰朕綜理軍務年久經歷甚多且曾親統大兵安定邊塞衆議欲於明歲進兵又慮路遠糧米難運其見不可謂非但大兵進勦策妄阿喇布

坦勢不能當必致逃避明年著暫停進兵加意耕種  
將糧餉馬匹預備整齊後年再行進兵其盛京寧古  
塔兵丁照舊發往京城之兵著暫停止策妄阿喇布  
坦詞雖卑遜竟遣人盜我噶斯口兵丁之馬我兵豈  
可坐守著將空圭扎卜堪兵內揀選精騎由阿爾臺  
作三四路襲擊巴里坤兵內揀選精騎作兩路襲擊  
此襲擊之兵遇可擊之處即行襲擊可取則取應退  
則退相機而行襲擊後仍回駐兵處策妄阿喇布坦

地方必然震動其餘黨或有變端以致逃亡亦未可  
定我兵如此一舉其道路地勢皆可悉知將此詢滿  
漢大臣若仍欲明歲進勦爾等將原議具奏尋議曰  
明年應暫停進勦令空圭扎卜堪之兵移近汎  
界駐劄加意耕種然我兵與其坐守不如兩路  
派兵襲擊至所派兵丁數目由何路襲擊及派  
領兵官員應令軍中大臣酌議奏

聞奏入

上從之至是

上諭侍衛郎秦等曰爾等往諭尚書富寧安明歲暫停  
進兵之故朕親加籌度復命議政大臣等詳議已降  
旨於兩路出征大臣矣遣兵襲擊之處爾等與富寧  
安彼處大臣及公傅爾丹并厄魯特等甚屬狡詐指  
貝子公等會同詳議具奏至厄魯特等甚屬狡詐指  
稱投誠或潛來侵犯亦未可定此處應加意防範如  
果實心率衆來投將彼為首之人解送來京其餘令

在克爾倫河地方遊牧交與左翼喀爾喀扎薩克等  
酌量安插所遣襲擊兵丁將擒獲賊犯釋放一二人  
告彼云汝輩盜竊中國馬匹所以邊上駐劄之兵並  
未候旨即行追勦前進今朝廷深憫汝輩降旨不許  
肆行殺戮因此各回汎界再傳諭公博貝此處正伊  
効力之所著益加勤慎厄魯特喀爾喀公內亦有身  
材壯健者著將和托輝特等處兵派出一同前往襲  
擊如此則策妄阿喇布坦情形自然顯露矣然軍機



事務臨期酌量難以預揣惟在領兵大臣善為籌度耳爾等會同定議後速行奏聞

命散秩大臣阿喇衲與郎泰等傳諭祁里德

先是祁里德疏言巴里坤之兵若前進必易得吐魯番乘勢即可攻取朱爾都斯地方相應選兵一萬六千分為兩路一由布拉罕河一由額林哈畢爾噶前進兵丁食用駐劄與行走無異必於明年進兵始為有益及是


上并諭議政大臣等曰祁里德奏請明年必宜進兵意見亦是在祁里德必有確見之處或一應糧餉馬匹俱已齊備有易於成功之機會亦未可定著阿喇衲與郎泰保住同往祁里德處會同衆喀爾喀王貝勒貝子公等并軍中大臣一同詳議議定後阿喇衲等再往巴里坤軍前會同彼處大臣詳議倘明年進兵之處稍有遲疑即照朕從前諭旨將襲擊之處詳議具奏

乙卯

命封羅卜藏丹津等

上諭理藩院曰青海已故親王扎什巴圖爾自效順以  
來一心向化伊子羅卜藏丹津人材亦優著封為親  
王其台吉達顏係達賴巴圖爾之孫為人誠實感朕  
深恩實心辦事甚屬勤勞著封為貝勒台吉巴爾珠  
爾阿喇卜坦拉扎卜阿喇卜坦俱著封為貝子台吉  
丹津著封為輔國公察罕丹津之壻台吉阿喇卜坦

格勒克著封為一等台吉



平定準噶爾方略前編卷三